

## Upendo wa Kiagano



## SABATO MCHANA

**Somo la Juma Hili:** 2 Pet. 3:9, Kum. 7:6-9, Rum. 11:22, 1 Yoh. 4:7-20, Yn. 15:12, 1 Yoh. 3:16.

**Fungu la Kukariri:** “Yesu akajibu, akamwambia, Mtu akinipenda, atalishika neno langu; na Baba yangu atampenda; nasi tutakuja kwake, na kufanya makao kwake” (Yohana 14:23).

**W**engi wamefundishwa kwamba neno la Kiyunani agape linarejelea upendo ambao ni wa pekee kwa Mungu, huku maneno mengine yanayomaanisha upendo, kama vile *phileo*, yanarejelea aina tofauti za upendo, zenye upungufu zaidi kuliko agape. Wengine wanadai, pia, kwamba *agape* inarejelea upendo wa upande mmoja, upendo ambao hutoa tu lakini kamwe haupokei, upendo usiotegemea kabisa mwitikio wa mwanadamu.

Hata hivyo, uchunguzi makini juu ya wa upendo wa Mungu katika Maandiko yote unaonesha kwamba mawazo haya, ingawa yanakubaliwa na wengi, yana makosa. Kwanza, neno la Kiyunani *agape* halirejelei tu upendo wa Mungu bali pia upendo wa kibinadamu, hata wakati mwingine upendo wa kibinadamu ulioelekezwa vibaya (2 Tim. 4:10). Pili, katika Maandiko yote, yapo maneno mengi zaidi ya agape yanayorejelea upendo wa Mungu. Kwa mfano, Yesu alifundisha, “Kwa maana Baba Mwenyewe anawapenda [*phileo*] kwa kuwa ninyi mmenipenda [*phileo*] mimi” (Yn. 16:27). Hapa, neno la Kiyunani *phileo* halitumiki tu kumaanisha upendo wa kibinadamu bali pia upendo wa Mungu kwa wanadamu. Kwa hivyo, *phileo* halirejelei aina yenye upungufu wa upendo, bali upendo wa Mungu wenyewe.

Maandiko pia yanafundisha kwamba upendo wa Mungu si wa upande mmoja, bali ni wa uhusiano wa kina, kwa kuwa ni jambo la maana mno kwa Mungu ikiwa wanadamu wataonesha upendo Wake Kwake na kwa wengine au la.

*\*Jifunze somo la juma hili kwa maandalizi ya Sabato ya Januari 11.*

## Upendo wa Mungu wa Milele

Maandiko yako wazi: Mungu anampenda kila mtu. Aya maarufu zaidi ya Maandiko, Yohana 3:16, inatangaza ukweli huu: “Kwa maana jinsi hii Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.”

**Soma Zaburi 33:5 na Zaburi 145:9. Aya hizi zinafundisha nini kuhusu jinsi fadhili, huruma na rehema za Mungu zilivyo pana?**

Wengine wanaweza kufikiri kwamba hawapendeki, au kwamba Mungu anaweza kumpenda mtu mwingine yeyote, lakini si wao. Hata hivyo, Biblia inatangaza daima kwamba kila mtu anapendwa na Mungu. Hakuna ambaye Mungu hampendi. Na kwa sababu Mungu anampenda kila mtu, anataka pia kila mtu aokolewe.

**Soma 2 Petro 3:9, 1 Timotheo 2:4 na Ezekieli 33:11. Maandiko haya yanafundisha nini kuhusu shauku ya Mungu ya kumwokoia kila mtu?**

Aya baada ya Yohana 3:16 inaongeza: “Maana Mungu hakumtuma Mwana ulimwenguni ili auhukumu ulimwengu, bali ulimwengu uokolewe katika yeye” (Yn. 3:17). Kama ingekuwa ni uamuzi wa Mungu peke Yake, kila mwanadamu angekubali upendo Wake na kuokolewa. Hata hivyo, Bwana hatalazimisha upendo Wake kwa yeyote. Watu wana uhuru wa kukubali au kukataa.

Na ingawa wengine wanaukataa, Mungu haachi kuwapenda. Katika Yeremia 31:3, anatangaza kwa watu Wake: “Naam nimekupenda kwa upendo wa milele, ndiyo maana nimekuvuta kwa fadhili zangu.” Mahali pengine, Biblia inafundisha tena na tena kwamba upendo wa Mungu hudumu milele (Tazama, kwa mfano, Zaburi 136). Upendo wa Mungu haukomi kamwe. Ni wa milele. Hili ni gumu kwetu kuelewa kwa sababu mara nyingi tunaona ni rahisi kutowapenda wengine, sivyo?

Hata hivyo, ikiwa sisi kama mtu mmoja mmoja tungeweza kujifunza kupata uzoefu wa uhalisi wa upendo huo—yaani, kuujua sisi wenyewe upendo wa Mungu—tungeweza kuishi na kuwatendea wengine kwa namna tofauti iliyoje.

Ikiwa Mungu anampenda kila mtu, hii ina maana kwamba ni lazima awapende baadhi ya watu wanaodharauliwa kiasi, kwa sababu kuna watu (wengi, kwa kweli) wanaodharauliwa. Upendo wa Mungu kwa watu hawa unapaswa kutufundisha nini kuhusu jinsi tunavyopaswa kutafuta kuhusiana nao, pia?



## Upendo wa Kiagano

Mara nyingi Biblia inaelezea uhusiano wa pekee wa upendo wa Mungu nasi kwa kutumia sitiari za familia au uhusiano wa damu, hasa sitiari za upendo kati ya mume na mke au wa mama mwema kwa mtoto wake. Sitiari hizi hutumiwa hasa kuelezea uhusiano maalum kati ya Mungu na watu Wake wa agano. Huu ni uhusiano wa upendo wa kiagano, ambao hauhusishi tu upendo wa Mungu kwa watu Wake lakini pia matarajio kwamba watu wataukubali upendo huu na kuitikia kwa kumpenda Yeye (na wao kwa wao).

**Soma Kumbukumbu la Torati 7:6-9. Aya hizi zinafundisha nini kuhusu uhusiano kati ya Mungu kufanya maagano na fadhili za Mungu?**

Kumbukumbu la Torati 7:9 inaelezea aina ya pekee ya upendo alionao Mungu kwa watu Wake wa agano, uhusiano ambao kwa kiasi fulani unategemea ikiwa wataendelea kuwa waaminifu au la. Upendo wa Mungu hauna masharti, lakini uhusiano wa kiagano na watu Wake una masharti.

Neno linalotafsiriwa “fadhili” au “rehema” katika Kumbukumbu la Torati 7:9, *hesed*, lenyewe linatoa kielelezo cha kipengele cha agano cha upendo wa Mungu (na mengi zaidi). *Hesed* mara nyingi hutumiwa kuelezea ukuu wa rehema, wema na upendo wa Mungu. Kati ya mambo mengine, *hesed* inarejelea fadhili, au upendo thabiti, kwa mwingine ndani ya uhusiano wa upendo uliopo wa wao kwa wao. Pia huanzisha uhusiano kama huo, kwa matarajio kwamba upande mwingine utaonesha fadhili hii vilevile.

*Hesed* ya Mungu huonesha kwamba fadhili Zake ni za kutegemeka sana, thabiti na za kudumu. Lakini, wakati huo huo, kupokea manufaa ya *hesed* ni kwa masharti, kunategemea utayari wa watu Wake kutii na kudumisha upande wao wa uhusiano (tazama 2 Sam. 22:26, 1 Fal. 8:23, Zab. 25:10, Zab. 32:10, 2 Nya. 6:14).

Upendo thabiti wa Mungu ndiyo msingi wa mahusiano yote ya upendo, na hatuwezi kamwe kuufikia upendo huo. Mungu hakutupatia tu kuishi bila masharti, bali pia katika Kristo alijitoa bure kwa ajili yetu. “‘Hakuna aliye na upendo mwingi kuliko huu, wa mtu kuutoa uhai wake kwa ajili ya rafiki zake’” (Yn. 15:13). Hakuna swali, udhihirisho mkuu zaidi wa upendo wa Mungu ulifunuliwa wakati Bwana “alijinyenyekeza akawa mtii hata mauti, naam, mauti ya msalaba” (Flp. 2:8).

Ni njia zipi ambazo unaweza kudumisha ukweli wa upendo wa Mungu katika mawazo yako? Kwa nini ni muhimu kufanya hivyo?

## Uhusiano Wenye Masharti

Mungu huita na kumwalika kila mtu katika uhusiano wa karibu zaidi wa upendo Naye (Tazama Mt. 22:1–14). Kuitikia wito huu inavyofaa kunahusisha utii kwa amri ya Mungu ya kumpenda Mungu, na kuwapenda wengine (tazama Mt. 22:37–39). Kwa mtu kupata manufaa ya uhusiano huu na Mungu inategemea ikiwa mtu ataamua kwa hiari kuukubali au kuukataa upendo Wake.

**Soma Hosea 9:15, Yereimia 16:5, Warumi 11:22 na Yuda 21. Maandiko haya yanafundisha nini kuhusu ikiwa faida za upendo wa Mungu zinaweza kukataliwa—hata kupotezwa?**

Katika maandiko haya na mengine, kupata manufaa ya uhusiano wa upendo na Mungu kunaelezwa tena na tena kwamba kunategemea mwitikio wa mwanadamu kwa upendo Wake. Hata hivyo, hatupaswi kufanya makosa ya kufikiri kwamba Mungu hukoma kabisa kumpenda mtu yeyote. Kama tulivyoona, upendo wa Mungu ni wa milele. Na, ingawa Hosea 9:15 inamjumuisha Mungu kusema juu ya watu Wake, “‘Sitawapenda tena,’” ni muhimu kukumbuka kwamba baadaye katika kitabu hicho hicho Mungu anatangaza kuhusu watu Wake, “‘Nitawapenda kwa ukunjufu wa moyo.’” (Hos. 14:4). Hosea 9:15 haiw ezi kumaanisha kwamba Mungu anaacha kabisa kuwapenda watu Wake. Ni lazima irejeele, badala yake, kwa sharti la kipengele fulani au manufaa ya uhusiano wa upendo na Mungu. Na jinsi tunavyoitikia upendo Wake ni muhimu ili uhusiano huu kuendelea.

“‘Yeye aliye na amri zangu, na kuzishika, yeye ndiye anipendaye; naye anipendaye atapendwa na Baba yangu; nami nitampenda na kujidhihirisha kwake’” (Yn. 14:21). Vivyo hivyo, Yesu anawatangazia wanafunzi Wake, “‘kwa maana Baba mwenyewe awapenda kwa kuwa ninyi mmenipenda mimi, na kusadiki ya kwamba mimi nalitoka kwa Baba’” (Yn. 16:27).

Maandiko haya na mengine yanafundisha kwamba kudumisha manufaa ya uhusiano unaokoa na Mungu kunategemea ikiwa tutaokubali upendo wa Mungu (ambao unahusisha utayari wa kuwa chombo cha kubeba upendo huo, pia). Tena, hii haimaanishi kwamba upendo wa Mungu hukoma. Badala yake, kama vile tu ambavyo hatuwezi kulizua jua kuangaza bali tunaweza kujitenga na miale ya jua, hatuwezi kufanya lolote ili kukomesha upendo wa Mungu wa milele, lakini hatimaye twaweza kukataa uhusiano na Mungu na, hivyo, kujitenga na kile unachotoa, hasa ahadi ya uzima wa milele.

Ni njia zipi ambazo watu wanaweza kuona na kupata uzoefu wa uhalisia wa upendo wa Mungu, wawe wanampenda vilevile au la? Kwa mfano, ulimwengu wa asili, hata baada ya dhambi, unadhihirishaje upendo Wake?



## Rehema Iliyopotezwa

Upendo wa Mungu ni wa milele na haustahiliwi. Hata hivyo, wanadamu wanaweza kuukataa. Tunayo nafasi ya kuukubali au kuukataa upendo huo, lakini kwa sababu tu Mungu anatupenda bila masharti kwa upendo Wake mkamilifu, wa milele kabla ya chochote tunachofanya (Yer. 31:3). Upendo wetu kwa Mungu ni mwitikio wa kile ambacho tayari tumepewa hata kabla hatujaomba.

**Soma** 1 Yohana 4:7–20, ukiwa na msisitizo maalum katika aya ya 7 na 19. Hili linatuambia nini kuhusu kipaumbele cha upendo wa Mungu?

Upendo wa Mungu daima huja kwanza. Ikiwa Mungu asingetupenda sisi kwanza, tusingeweza kumpenda Yeye pia. Wakati ambapo Mungu alituumba tukiwa na uwezo wa kupenda na kupendwa, Mungu mwenyewe ndiye msingi na chanzo cha upendo wote. Tuna uchaguzi, hata hivyo, ikiwa tutakubali na kisha kuuakisi katika maisha yetu. Ukweli huu unaoneshwa katika mfano wa Kristo wa mtumishi asiyesamehe (tazama Mt. 18:23–35).

Katika mfano huo, tunaweza kuona kwamba hakuna njia ambayo mtumishi huyo angeweza kumlipa bwana wake deni lake. Kwa mujibu wa Mathayo 18, mtumishi huyo alikuwa na deni la bwana wake talanta 10,000. Talanta moja ilikuwa takribani dinari elfu sita. Na dinari moja ndiyo ambayo mfanyakazi wa kawaida angelipwa kwa siku moja ya kazi (linganisha na Mt. 20:2). Kwa hivyo, ingemchukua mfanyakazi wastani wa siku 6,000 za kazi kupata talanta moja. Tuseme baada ya kuondoa siku za mapumziko, kwamba mfanyakazi wa kawaida anaweza kufanya kazi siku 300 kwa mwaka na hivyo kupata dinari 300 kwa mwaka. Kwa hivyo ingemchukua mfanyakazi wastani wa takribani miaka ishirini kulipa talanta moja, ambayo ilikuwa na dinari 6,000 ( $6,000/300 = 20$ ). Ili kupata talanta 10,000, basi, mfanyakazi wa kawaida angelazimika kufanya kazi miaka 200,000. Kwa ufupi, mtumishi asingeweza kamwe kulipa deni hili. Hata hivyo, bwana huyo alimhurumia mtumishi wake na kumsamehe bila masharti ya deni lake kubwa.

Hata hivyo, mtumishi huyu aliyesamehewa alipokataa kusamehe deni dogo zaidi la dinari 100 la mmoja wa watumishi wenzake na kumtupa gereza kwa sababu ya deni hilo, bwana huyo alikasirika na kughairi msamaha wake wenye rehema. Mtumishi alipoteza upendo na msamaha wa bwana wake. Ingawa huruma na rehema za Mungu haziishi kamwe, mtu anaweza hatimaye kukataa, hata kupoteza, faida za huruma na rehema za Mungu.

**Fikiria** juu ya kile ulichosamehewa na kile ambacho ilikugharimu kusamehewa na Yesu. Hili linapaswa kukuambia nini kuhusu kuwasamehe wengine?

## Mmepata Bure; Toeni Bure

Kama ambavyo mtumishi asingeweza kamwe kulipa deni lake kwa bwana wake, kamwe hatuwezi kumlipa Mungu. Tusingeweza kamwe kuufanyia kazi au kustahili upendo wa Mungu. “Bali Mungu aonyesha pendo lake yeye mwenyewe kwetu sisi, kwa kuwa Kristo alikufa kwa ajili yetu, tulipokuwa tungali wenye dhambi” (Rum. 5:8). Ni upendo wa ajabu kiasi gani! Kama vile 1 Yohana 3:1 inavyosema, “Tazameni, ni pendo la namna gani alilotupa Baba, kwamba tuitwe wana wa Mungu!”

Hata hivyo, tunachoweza na tunachopaswa kufanya ni kuuakisi upendo wa Mungu kwa wengine kadiri tuwezavyo. Ikiwa tumepokea huruma na msamaha mkubwa kiasi hicho, ni kwa kiasi gani tunapaswa kuwaonesha wengine huruma na msamaha? Kumbuka kwamba mtumishi huyo alipoteza huruma na msamaha wa bwana wake kwa sababu alishindwa kuvionesha kwa mtumishi mwenzake. Ikiwa tunampenda Mungu kweli kweli, hatutashindwa kuuakisi upendo Wake kwa wengine.

**Soma** Yohana 15:12, 1 Yohana 3:16 na 1 Yohana 4:7–12. Aya hizi zinafundisha nini kuhusu uhusiano kati ya upendo wa Mungu, upendo wetu kwa Mungu na upendo kwa wengine? \_\_\_\_\_

Mara tu baada ya Yohana 15:12, Yesu aliwaambia wanafunzi Wake, “ ‘Ninyi mmekuwa rafiki zangu, mkitenda niwaamuruyo’ ” (Yn. 15:14). Na Yesu aliwaamuru nini? Miongoni mwa mambo mengine, Yesu aliwaamuru (na sisi) kuwapenda wengine kama vile Yeye alivyowapenda wao. Hapa na kwingineko, Bwana anatuamuru kumpenda Mungu na kupendana sisi kwa sisi.

Kwa ufupi, tunapaswa kutambua kwamba tumesamehewa deni lisilo na kikomo, deni ambalo kamwe hatuwezi kulipa, deni lililolipwa msalabani tu kwa ajili yetu. Kwa hiyo, tunapaswa kumpenda na kumsifu Mungu na kuishi kwa upendo na neema kwa wengine. Kama vile Luka 7:47 inavyofundisha, yule aliyesamehewa sana, anapenda sana, lakini “ ‘asamehewaye kidogo, huyo hupenda kidogo.’ ” Na ni nani kati yetu asiyetambua ni kiasi gani amesamehewa?

Ikiwa kumpenda Mungu kunajumuisha kuwapenda wengine, tunapaswa kushiriki ujumbe wa upendo wa Mungu kwa uharaka, kwa neno na kwa matendo. Tunapaswa kuwasaidia watu katika maisha yao ya kila siku hapa na sasa, na pia kutafuta kuwa mfereji wa upendo wa Mungu na kuwaelekeza watu kwa Yule anayewapa ahadi ya uzima wa milele katika mbingu mpya na nchi mpya—kiumbe kipya kabisa kutoka katika ulimwengu huu, aliyeharibiwa na kuathiriwa sana na dhambi na kifo, matunda huzuni ya kuukataa upendo wa Mungu.

Ni hatua zipi mahususi unaweza kuchukua ili kumpenda Mungu kwa kuwapenda wengine? Ungeweza kufanya nini leo na katika siku zijazo ili kuwaonesha watu upendo wa Mungu na (hatimaye) kuwaalika kufurahia maana hasa ya kuwa na ahadi ya uzima wa milele?



**Iifunze Zaidi:** Soma Ellen G. White, "The Privilege of Prayer (Fursa ya Maombi)," uk. 93-104, katika Steps to Christ.

"Wekeni mahitaji yenu, furaha zenu, huzuni zenu, mahangaiko yenu na hofu zenu mbele za Mungu. Hamwezi kumlemea; hamwezi kumchosha. Yeye anayehesabu nywele za vichwa vyenu anajali mahitaji ya watoto Wake. 'Bwana ni mwingi wa rehema, mwenye huruma.' Yakobo 5:11. Moyo Wake wa upendo unaguswa na huzuni zetu na hata kwa kuzitamka. Mpelekee kila kitu kinachofadhaisha akili. Hakuna lililo kubwa sana kwake kubeba, kwani Yeye ndiye anayeshikilia malimwengu, Anatawala mambo yote ya ulimwengu. Hakuna jambo lolote ambalo kwa njia yoyote linahusu amani yetu ni dogo sana kwa Yeye kutambua. Hakuna sura katika uzoefu wetu ambayo ni giza sana Kwake kuweza kuisoma; hakuna fadhaa ngumu sana Kwake kutatua. Hakuna msiba uwezao kumpata hata aliye mdogo kabisa wa watoto Wake, hakuna wasiwasi wowote unaosumbua moyo, hakuna shangwe ya furaha, hakuna ombi la dhiti linalotoka midomoni, ambalo Baba yetu wa mbinguni halioni, au ambalo Yeye havutiwi nalo mara. 'Huwaponya waliopondeka moyo, na kuziganga jeraha zao.' Zaburi 147:3. Uhusiano kati ya Mungu na kila nafsi u dhahiri na umejaa kana kwamba hakukuwa na nafsi nyingine duniani kushiriki utunzaji Wake, hakuna nafsi nyingine ambayo kwayo alimtoa Mwanawe mpendwa."—Ellen G. White, *Steps to Christ*, uk. 100.

## Maswali ya Kujiadili:

①Tafakari sentensi iliyo hapo juu: "Uhusiano kati ya Mungu na kila nafsi u dhahiri na umejaa kana kwamba hakuna nafsi nyingine duniani inayoshiriki utunzaji Wake, hakuna nafsi nyingine ambayo kwayo alimtoa Mwanawe mpendwa." Hili linakupa faraja gani, na unapaswa kuishi vipi maishani mwako, ukijua ukaribu wa Mungu kwako na utunzaji Wake kwako? Unawezaje kujifunza kuishi na uhalisi wa ahadi hiyo nzuri ajabu? Fikiria ikiwa, siku baada ya siku, ungeweza kuiamini kwa hakika.

②Kwa kuzingatia somo la juma hili, unaelewaje Zaburi 103:17, 18? Inafunua nini kuhusu namna upendo wa Mungu ulivyo wa milele, lakini jinsi manufaa ya uhusiano na Mungu yanavyotegemea ikiwa tutaukubali upendo Wake?

③Ni kwa njia zipi kujua hili kunaleta tofauti katika uhusiano wako na Mungu? Kunaathirije jinsi unavyofikiri kuhusu huzuni za wengine?